

Prome Minister Mike Eman:

Minister De Meza ta encarga cu asuntonan relaciona na e mocion riba refineria



ORANJESTAD (AAN):

Den un entrevista a puntra Prome Minister Mike Eman tocante di e status di e mocion relaciona na institucion di un comision pa cu e refineria cu a pasa den Parlamento durante tratamento di Presupuesto 2015. Despues cu Parlamento a pasa e mocion, manera tur otro mocion Ministerraad ta discuti y pasa esaki tambe y a wordo dicidi den Consejo di Minister cu Minister Mike de Meza lo keda encarga cune.

E mocion tabata pidi pa institui un comision pa evalua tur angulo y detaye y haci un ultimo intento cu lo por of no resulta den e reapertura di e refineria. Eman a bisa cu su colega di biaha a cuminsa mira unda e mocion tin aspectonan cu gobierno no tabata haciendo ainda of tabata haciendo caba. “Riba e area di busca un alternativa pa Valero mi ta kere henter nos comunidad a convivi cu nos gobierno y e situacion di empleadonan,” Prome Minister Eman a subraya.

El a resumi e caminda cu Gabinete Mike Eman I a tuma pa logra e reapertura na 2011 bao di Valero mes cu a resulta den un ciere atrobe na 2012. El a splica cu e gobierno a haya e refineria cera na 2009, nan a cera un MOU na 2010, despues na april 2010 a yega na un settlement agreement cu a wordo pasa na juni 2010. Na e punto ey, su gobierno a logra surpasa bastante obstaculo y Valero a dicidi di habri e refineria bek, segun Eman a elabora. Lamentablemente el a dura solamente un aña habri bao Valero, cual no tabata hayando e resultadonan desea y a bolbe cera e refineria.

Na momento cu a duna indicacion cu nan lo ta cerando atrobe, gobierno a move shelo y tera pa tur opcion pa cumpra of yega na un acuerdo cu Valero, Eman a subraya. E

mandatario a bisa cu tabatin hopi esfuerso haci cu hopi dedicacion. A bati na porta di multinacionalnan sumamente grandi rond mundo manera PDVSA, Ecopetrol, Petrobras y Petrochina, pero tambe companianan mas chikito manera Rubiales, el a agrega. “Mi ta kere cu parlamento por ta sigur cu hopi esfuerso a wordo haci. Nos a move shelo y tera!” Eman a bisa.

E mandatario a comenta cu Minister De Meza tin diferente grupo trahando riba e tema aki y lo tene parlamento na altura con e ta cumpliendo cu e mocion cu parlamento a pasa pa wak si tin alternativa den e ruta pa reapertura.

Prome Minister Eman a añadi cu pa Aruba e area di e refineria ta hopi importante, sea pa actividadnan di refineria of otro actividadnan industrial. Otro actividadnan tambe lo trece un estimulo grandi pa San Nicolas y tin un cantidad grandi di empresa cu ta anunciando nan mes y ta mira posibilidadnan pa desaroyo industrial den e area.

Eman a menciona entre otro un empresa cu ta involvi den actividadnan di exploracion di petrolio y gas cu a expresa su interesa caba, unda cu e intencion ta pa uza Aruba pa almacena ekipo y materialnan y haci mantencion di nan ekiponan grandi.

Ta mira hopi oportunidad pa un salida nobo pa e area, Eman a expresa. E prome mandatario a mostra hopi optimista den un redestinacion exitoso di e area cu el a yama excepcional pa entre otro su wafnan profundo y ubicacion strategico. Den e siguiente siman pa lunanan e direccion cu mester tuma cu e area aki lo bira conoci, segun Eman, kende a conclui cu e resultado sea den reapertura di e refineria of redestinacion di e area lo duna un empuhe nobo na economia di Aruba.